

**Kalaallit Nunaat tamakkerlugu nunaqarfiit ineriartortinneqarnissaannut ukioq 2050-imut pilersaarummik kingusinnerpaamik UKA 2027-mut suliaqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarummi sullissinernut tunngaviusunut, attaveqaasersuutinit, inuussutissarsiornikkut periarfissanut pitsaasunillu ineqarnissamut naligiimmik periarfissaqarnissaq qitiutinneqassapput.
(Inatsisartunut ilaasortaq Kuno Fencker, Naleraq**

pillugu

Sanaartornermut Ataatsimiititaliap

Siunnersuutip aappassaaneerpeqarneranut

ISUMALIUTISSIISSUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq, Gerth Mikaelson, Naleraq, siulittaasup tullia
Inatsisartunut ilaasortaq, Jørgen Rosbach, Demokraatit
Inatsisartunut ilaasortaq Nivi Heilmann Efraimsen, Inuit Ataqatigiit
Inatsisartunut ilaasortaq Knud Kleemann, Atassut

Siunnersuutip imarisaa siunertaalu

UKA 2025-imi ulloq 8. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaat tamakkerlugu nunaqarfiit ineriartortinneqarnissaannut ukioq 2050-imut pilersaarummik suliaqarnissamut Naalakkersuisut peqquneqarnissaat siunnersuuteqartup siunnersuutigaa. Pilersaarutip ilaatigut imarissavai attaveqaasersuutinit aningaasaliinerit, inissianik inissiallu nukissiuutinit atuinikinnerulersinniarlugit iluarsaaneq, peqqinnissaqarfiup sullississutaanut atuisinnaanermik ilinniartitaanermillu nukittorsaaneq, aningaasaqarnikkut

ineriartortitsineq, atuisunut akiliuteqartitsineq aammalu pisortat, namminersortut nunallu tamalaat aningaasaataat ilaatillugit aningaasalersuinnermut periusissioinnissaq.

Siunnersuutip Inatsisartunit siullermeerneqarnera

Allannguutissatut siunnersuut tulluuttoq siullermeerinninnermi Naalakkersuisunit saqqummiunneqarpoq:

”Naalakkersuisut kingusinnerpaamik UKA 2027-mut Isorliunerusunut iliuusissanut pilersaarusoqquneqarnissaat pillugu Inatsisartut aalajangiiffigisassaattut siunnersuut. Tigussaasumik inuuniarnermi atukkat pitsanngorsarneqarnissaat, innuttaasullu pisariaqartitaasa nalinginnaasut naammassineqarnissaat, kiisalu ineriartortitsinissamut, inuussutissarsiornermut nutaaliornermullu tunngavissaqalersitsinissaq, pilersaarummi ukkatarineqassapput.”

Allannguutissatut siunnersuut tulluuttoq siullermeerinninnermi Inuit Ataqatigiit saqqummiuppaat:

” Kalaallit Nunaat tamakkerlugu nunaqarfiit ataqatigiissaakkamik ineriartortinneqarnissaat siunertarlugu Naalakkersuisut KANUNUPE kommunillu tamaasa peqatigalugit suliamik aallarnisaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliamik aallartitsinermi sullissinernut tunngaviusunut, attaveqaasersuutitut, inuussutissarsiornikkut periarfissanut pitsaasunillu ineqarnissamut naligiimmik periarfissaqarnissaq qitiutinneqassapput.”

Allannguutissatut siunnersuut tulluuttoq siullermeerinninnermi Siumumit saqqummiunneqarpoq:

“Kalaallit Nunaanni nunaqarfinni isorliunerusuni illoqarfinnilu minnerusuni, qitiusumik aqutsiveqarfiit avataaniittut, ineriartortinnissamut periarfissaat siunertarlugu, sutigullu aningaasaliisoqartariaqarnera ilanngullugu nuna tamakkerlugu pilersaarummi SIUMUT saqqummiunneqartarnissaat tunngavigalugu Naalakkersuisut peqquneqarnissaat pillugu Inatsisartuni aaliangiiffigisassatut siunnersuut. Taamaasiornikkut tigussaasumik, tunitsiveqarnikkut, aalisarnikkut, suliffissaqarniarnikkut, nukissiuteqarnikkut, inulerinikkut, peqqinnissaqarnikkut aningaasaliisoqarnissaanik ineriartuutaasariaqartunillu pisariaqartitsinerit, nuna tamakkerlugu pilersaarummi ilaatinneqartassallutik.”

Nunaqarfinni isorliunerusunilu pissutsit nukittorsaavigineqarnissaat inuuniarnikkullu pitsanngorsaasoqarnissaa Inatsisartut ataatsimiittarfianni tapersorsorluarneqarpoq. Illoqarfiit mikinerusut siunissamut isumannaarnissaat pisariaqartoq taamatuttaaq ersarissaatigineqarpoq.

Angusassatut kissatigineqartut piviusunngortinneqarnissaat siunnersuutip oqaasertaanit qanoq pitsaanerpaamik qulakkeerneqarsinnaanersoq aamma oqallisigineqarpoq.
Tamanna tunngavigalugu siunnersuut Sanaartornermut ataatsimiititaliamut innersuunneqarpoq.

Siunnersuutip aningaasatigut allaffissornikkullu kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Siunnersuutip piviusunngortinneqarnissaanut aningaasatigut kingunerisassat matumani allanneqarsimaneri siunnersuummut naapertuuttoq ataatsimiititaliamit maluginiarneqarpoq. Taamaalluni pilersaarut AC- fuldmægtigit marluk ukiumi ataatsimi akissarsiaasa nalinginik 1.000.000 kr.-inik akeqarnissaa siunnersuuteqartup oqaatigigaa ataatsimiititaliamit maluginiarneqarpoq.

Sinakkusiussat taakkua iluanni allannguutissatut siunnersuutit piviusunngortinneqarsinnaasut ataatsimiititaliaq naliliivoq.

Ataatsimiititaliap siunnersuummut oqaaseqaatai

Aallarniutigalugu naalakkersuisoqarfiit akimorlugit nunatsinni isorliunerusunut iliuusissamik pilersaarummik nutaamik saqqummiussisussamik Naalakkersuisut aallartitsisimanerat ataatsimiititaliamit maluginiarneqarpoq. Taamaalluni Naalakkersuit allannguutissatut siunnersuuteqarnerminni iluussisatut pilersaarut aallartinneqareersoq aallaavigivaat.

Ineriartortitsinermi kommunit inissisimanerat nunaqarfinni inuttunngitsunilu aningaasaliiffigineqarnissamut periarfissat ilaatigut inersuarmi oqallisigineqangaatsiarput. Taamatullu inissiat inissiallu nutarsarneqarnissaannik nutaanillu sanaartornissamik pisariaqartitsineq ersarissarneqarluni.

Nuna tamakkerlugu ineriartortoqarnissaa inussutissarsiutinut periarfissaqarnissaa aammalu najugaqarneq ataatsimiititaliamit pingaartinneqarput.

Ataatsimiititaliap inassutai

Allannguutissatut siunnersuut tulliuuttoq ataatsimiititaliamit isumaqatigiittumit saqqummiunneqarpoq:

” KANUNUPE kommunillu peqatigalugit isorliunerusunut iliuusissatut pilersaarummik suliaqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarummi inuuniarmi atukkanik tigussaasunik sullissinernullu tunngaviusunut pitsanngorsaanissaq qitiutinneqassaaq kiisalu sumi qanorlu ilinniartitaanikkut, niuernikkut, aalisarnikkut,

*suliffeqarnikkut, nukissiuuteqarnikkut, attaveqaasersuuteqarnikkut peqqinnissakkullu
anigaasaliisoqassanersoq ineriartortitsisoqassanersorlu nassuiaasiorneqassaaq.*

Taamatut oqaaseqarluni isumaliutissiisummillu allassimasutut paasinnilluni matumuuna
ataatsimiititaliap siunnersuut aappasaaniigassanngortippaa.

Justus Hansen
Siulittaasoq

Gerth Mikaelson
Siulittaasup tullia

Jørgen Rosbach

Nivi Heilmann Efraimsen

Knud Kleemann